

*Nowa Doba 01.06.1974:*

Wjeršk dwudnjowego wopyta (13.05.-15.05.1974) nimale 50 čěskosłowakskich prodrustwownikow z Kunčiny na Morawje pola serbskich a němskich pro- drustwownikow w Radworju bě wutoru dojimawy přecelski wječor na žurli Konsumowego hosćenca. Z wutrobitym přikleskom mytowachu hosćo a hosćiceljo poskićenja chora „Meja“ a šulerjow, kotřiž jim předstajichu spěwnu bajku „Złota husyca“.

Po tym zwurazništaj předsydže wobeju prodrustwow, Helmut Gäbler a Vladimir Kučera, w krótkimaj narěcomaj přeswědčenje, zo so přecelske zwiski mjez prodrustwownikami Radworja a Kunčiny z tutym wopytom skruća. Hižo spočatk julija pojedu Radworčenjo na wopyt na Morawu.

Z wotmachom zahra dujerska kapała z Budyšina k rejam. Přespěšnje so při nich miny hodžina po hodžinje a lědma što móhl rjec, kelko krasnych serbskich a čěskich spěwow tutón wječor po žurli klinčachu.

Čěscy přeceljo běchu pónđzelu wokoło připođnja do Radworja přijěli a sej popođnju z wulkim zajimom wobhladali tudyši kombinat za dejny skót a wokolinu wsy. Wječor dóndže k čilej wuměnje nazhonjenjow mjez předsydstwomaj wobeju prodrustwow. Wutoru wopytachu prodrustwownicy z Kunčiny wulkoskład běrnów w Zdžěri a agrochemiske srjedžišće w Žičenju. Rjane dožiwjenje bě za nich tež wuprawa do tysacletneho Budyšina.

Nanajwutrobnišo so ze swojimi šcedriwymi hosćicělemi rozžoňowawši, podachu so přeceljo z Kunčiny wčera dopođnja na dompuć, na kotrymž hišće wopytachu wobrazowu galeriju w Drježdžanach.

J. W.